

SIERÂ I VÔI PAR NO VIODI

Se noâtris o fossin a stâ sul ôr dal mont, o podaressin ancje infotâsi se ai caporions de pulitiche ur spicin lis mans; ma par nestre eterne disgracie o si cjatìn a jessi su la crosere plui pericolose e plui insanganade di dut il vecjo continent, o vivìn juste dulà che vignaressin a scontrâsi i ajars contraris e dulà che colares la prime tampieste. O varessin di trimâ a ogni bâr di nûl ch'al monte sù pal cîl, a ogni bugade di siroc che passe pes frascjs, pensant che a noâtris culì nissun nus es sparagne, nissun nus es à mai sparagnadis dopo che il mont al è mont.

Ma l'omp al à dibisugne di inludisi, di sierà i vôi par no viodi il pericol, di scuindi il cjâf tal savalon come l'ucel cence alis dal desert. No si pense mai vulintîr es robis brutis e i pinsirs neris si ju lasse par un'âtre dì o che si cîr di inneâju in tun bocâl di vin.

Cussì ancje i furlans di vuè no vuelin sintî a fevelâ di malincuniis, si butin cul cjâf in jù tai lôr afârs, tai lôr intares dal moment o tes lôr litighis di partît: e se cualchidun al cîr di visâju, se cualchidun ur fevele di pensâ `e lôr situazion e di metisi lis mans denant fintremai che son in timp, tignint ben amens che doman nissun alçarâ un dêt par parâju, s'invelègnin come liparis. E cui si tache daprûf des cotulis sbrindinadis di Rome, cui spalance i braz de bande di Moscje, cui si lasse puartâ indenant da l'aghe gruesse cence fâ nuje, cence pensâ nuje par salvâ la sô scusse. Dí lu vueli che la indivìnin!

(Patrie dal Friûl - 13/4/1947)